

Sa bisperas sa tigum sa mga kabatan-onan sa Europa sa Poznan, Poland ug sa kabatan-onang Asyano sa Manila, Pilipinas, kami mapasalamaton tungod sa pagdapit sa mga Kristiyanos sa Tsina. Pipila kanamong mga "brothers" nipuyo ug tulo ka simana uban kanila ug kami labihang natandog tungod sa ilang nagkadaiyang pamaagi sa pag abi-abi. Human sa nagkadaiyang mga tigum nga among gitambungan, mas tinu nga adunay panginahanglan nga pagasabton gikan sa ilang kahimtang ang ilang simbahan ug ang bantuanang nilang nasud, diin nagpuyo ang kalim-ag unom ka mga lumadnong katilingban.

Sulat gikan Taizé

Special Edition

SULAT 2010

Sulat gikan sa Tsina

Sa ganghaan sa Katolikong Katedral sa Beijing, ang mga Kristiyanos nagpuli-puli sa pag abi-abi sa mga dumuduong sa tibuok adlaw. Usa ka tigulang babaye ni asuy kanamo, "Human sa daghang katuigan nga gidili ang pagpadayag sa pagtoo, among nakita ang pagbukas sa mga ganghaan sa simbahan niadtong nanghinapos ang dekada 70. Karon ubay-ubay na nga mga dili Kristiyanos nga moduol ug makighimamat kanamo. Apan bisan sa among kahinangup, dili namo maabi-abi ang tanan."

Usa ka batan-ong lalaki nipatin-aw, "Ang Tsino nga kalag nagatuo kanunay sa kalangitan. Wala nahanaw sa nanglabay mga katuigan ang bilihong mga gawi, hilabina ang pagtinguha sa kahan-ay ug sa pagtahud sa mga katiguwangan. Sa bag-o pa lang nanglabay nga mga katuigan, nasinati ang paglambo ug kaharuhayan sa pagpuyo apan dungan niini daghan ang nibati ug galamhanong kahaw-ang ug nangita sa kahulogan sa kinabuhi. Nagkadaghan ang mga kabatan-onan nga nidangop sa pagtoo, hilabina sa mga dagkong dakbayan."

Ang Simbahan sa Tsina nagpabiling gamay ug kasagaran nagpuyo diha sa kawad-on. Apan puno sa kadasig ang pagtoo sa mga Kristiyanos! Nakadayeg kami sa ilang pagmakanunayon ug pagkamaunongon. Tataw kanamo nga ang Ginoo nagalihok diha kanila. Nakahimamat kami ug mga matuohon, nga bisan diha sa ilang yanong kahimtang, sila nagaugmad alang sa kalambuan sa ilang nasud. Sama pananglit sa lalawigan sa Sichuan, human sa makalilisang nga linug, ang uban kanila ni adto aron pagtabang sa mga nahiagum sa maong katalagman; nagpabilin sila ug gikahimut-an sa mga lumulupyo didto." Pipila ka tawo niasoy kanamo sa mga kasakit nga nahiaguman sa ilang mga ginikanan ug mga katigulangan tungod sa pagtuo. Sila mapasalamaton sa dihang ilang nasayran nga ang mga matuohon sa laing-laing dapit sa kalibutan nakighiusa kanila. Among gipahibalo didto sa usa ka dakong simbahanang Protestante nga ang mga kabatan-onan sa Taize sa tibuok kalibutan nag-ampo alang sa mga Kristiyanos sa Tsina matag Biernes, ug silang tanan namakpak sa pagkasayud nila niini.

Ang samad sa pagkabahin-bahin sulod sa mga simbahan sa kasaysayan nagbilin ug hilabihang kasakit. Diha sa pagtuo nga niabot na ang panahon nga ihikling na ang pagkabahin-bahin, adunay mga Kristiyanos karon nga naningkamot pagkab-ot sa pagkighiuli. Kini mahinungdanon nga sugdan diha sa kasing-kasing sa mga matuohon. Ang pagsangpit sa Ginoo diha sa katilingbanong pag-ampo mahimong usa ka paagi sa pagpadayag sa pagkab-ot sa kahiusahan.

Sa Tsina nagkadaghan ang mga Kristiyanos nga naka amgo sa mga mithi sa pagtakdo sa Ebanghelyo ug sa hamiling kaalam sa mga katiguwangan. Sa tibuok Asya, adunay pipila nga naningkamot sa pagpuyo sa ebanghelyo diha sa diyologo uban sa katikaran ug sa nagkalain-laing pundok sa pagtuo ug labi na sa paghatag ug dakong pagtagad sa mga kabus. Mahimo ba kaha nga madasig ang ubang Kristiyanos sa tibuok kalibutan niining maong pamaagi?

Agig timaan sa panaghigalaay ug pasalamat sa mga Kristiyanos sa Tsina, sa tuig 2009 ang katilingban sa Taize nipatik ug usa ka milyong Bibliya pinaagi sa "Operation Hope" ug niapud-apid niini sa tibuok nasud.

MATAG USA KATAWO, ADUNAY TINGUHA

Bisan sa dakong kalainan sa atong kaugmaran nga naghimo ug mga babag sa mga katawhan sa kalibutan, ang tanang katawhan nagmugna ug usa ka banay.¹ Ang among pagduaw sa Tsina ni-palig-on niining pagtuo dinhi kanamo.

Bisan unsa pa man ang atong katikaran, ang panuigon o ang atong kasaysayan, kita nagaambit sa susama nga tinguha, ang kahidlaw sa kahingpitan sa kinabuhi.

Ang Bibliya kanunay nga nagsubli sa maong pangindahay. Kini gilantaw sa susamang paghulma sa Ginoo kanato aron sa pag-agni kanato ngadto Kaniya.² Ato bang tugotan nga kining pangindahay mohaling sa atong kahaw-ang, ug dili ba nato dal-ion ang katagbawan niini?³ Kini mahimo nga gugmang nagdiliab sulod kanato ngadto Kaniya nga dili matugkad sa atong salabutan.⁴

Sa atong makanunayong pagpangita sa Ginoo, labaw nga makapatingala ang atong makaplagan: nga ang Ginoo una pa nga nangita kanato. Sa basahon ni propeta Oseas, ang Ginoo namulong sa iyang katawhan sama sa usa ka tawo ngadto sa iyang

¹ Usa ra kita ka banay nga nagpuyo sa mao rang kalibutan; mao nga angay dalion nato pag-angkon ang kaakuhan alang sa kamugnaan ug sa kalikopan.

² O Dios, akong Dios, gipangita ko ikaw sa banagbanag; giuhaw akong kalag kanimo. Ang akong kalawasan naghandom Kanimo, sama sa yutang uga nga nahikabsan sa tubig" (Psalm 63:1). "Ang akong kalag naghandom kanimo sa kagabhion; sa kinahiladman nagatu-aw ang akong kalag" (Isaiah 26:9).

³ Mahimo nga mahaylo kita nga tagbawon ang atong tinguha sa taphaw nga pamaagi. Dili ba kaha nga ang pagpatuyang usa ka paagi sa paglikay sa pagtubag sa mga pangutana nga atong gikahadlokang hangtod sa katapusang yugto?

⁴ Sa ika-upat nga siglo, si San Gregorio Nazianso niawit sa mga misteryo sa Dios: "Ikaw nga labaw sa tanan, unsaon kaha ka namo pagtawag sa laing ngalan? Unsang matanga sa awit ang among laylayan alang Kanimo? Walay pulong nga mahimong makapadayag kanimo.... Ang mga pagtu-aw sa lukop kalibutan, ang mga agulo sa tanan, nangindahay Kanimo." Sa susamang higayon si San Agustin nagsulat: "Diha sa atong mga pagtu-aw, gipatubo sa Dios ang atong pagtinguha Kaniya. Niining maong tinguha, gihinloan Niya ang kalag. Sa paghinlo, Iyang gitugutan nga motinguha pa gayud."

pinalangga: “Busa, ania karon, siya hayloon ko, ug dad-on ko siya ngadto sa kamingawan, ug sultihan ko siya sa madanihon.” Ug Siya nidugang: “Ug ikaw pangasaw-on ko nga kana-ko gayud sa walay katapusan... ug sa mahigugmaong-kalot, ug sa mga kalooy.”⁵

Diha kang Hesus, kining tinguha sa Ginoo alang sa katawhan nahimong usa ka tataw nga kamatuorang nakab-ot.⁶ Si Kristo naninguha nga magpabilin uban kanato sa hangtud, ug kini iyang gibayaran ug dako:pinaagi sa iyang kamatayon sa krus, nagpaubos siya hangtud nahimo siyang linutos luyo sa iyang pagkawalay sala. Karon, nga siya nabanhaw, siya mipadala sa Balaang Espirito kanato, usa ka dili makita nga timailhan nga nagdala kanato sa kahingpitan sa Dios.

PAGHAN-AY SA MGA TINGUHA

Ang tawhanon nga kasing-kasing puno sa naghingapin nga mga tinguha ug mga pangandoy: kita nagmithi sa nagkadaiyang butang, usahay ang mga butang nga nahisukwahi. Apan sayod kita nga dili nato mahimo ni maangkon ang tanan. Halayo man sa pagdangat ngadto sa masulub-ong pagtugyan, ang pagkaamgo niini mahimong makapalingkawas kanato ug makatabang sa hapsayng panimuyo.⁷

Tinuod nga mahinungdanon ang paghan-ay sa mga tinguha. Dili tanang tinguha dautan, apan dili usab tanan makaayo. Angay kita nga mapailubong magkat-on nga mahimo ug panig-ingan ug kung unsa ang ihikling.

Sa pagpili kung unsa nga tinguha ang ipatigbabaw, ang paghatag ug pagtagad sa kinauyokan sa atong kaugalingon, maoy usa na ka pamaagi sa pagpamati sa Ginoo. Ang Dios mamulong usab kanato pinaagi sa atong mga tinguha. Anaa kanato ang pag-ila sa Iyang tingog taliwala sa nagkadaiyang tingog sulod sa atong galamhan.⁸

PAGPUKAW SA ATONG MGA KAUGALINGON SA PAGTINGUHA SA GINOO

Ug angay natong pukawon ang kinahiladman natong mithi: ang pagtinguha sa Ginoo!

Tinuod nga dili sayon ang pag-alima nga mapabiling buhi ang diwa sa pagkatingala ug sa pagsimba, sanglit ang pagkabatid sa buhat gibutang sa hataas nga luna sa atong mga katilingban, ug ang paghimo sa ingon sa lagmit nga pamaagi. Apan sa sulod sa hataas nga kahilom diin sama nga walay na-

hitabo, ang Espirito Santo naga lihoc kanato, bisan kita wala naka amgo niini.

Ang pagkat-on unsaon paghulat... ang yanong pagpuyo, nga walay laing tumong ug katuyoan, pagluhod ug pag-ila nga ang Ginoo anaa sa atong taliwala, ang pag-abli sa atong palad timaan sa pagkamadawat, ug ang pagpahilom sa kaugalingon usa na ka tinong pagpadayag sa pagkaabli sa kaugalingon ngadto sa Ginoo.

Kabahin na sa katikarang Asyano ang mga timaan sa pagsimba ug pagpamalandong sulod na sa mga katuigan. Mahimo ba kaha nga ang mga Kristiyanos nga nahiagum sa mga kalibutanong gawi makakaplag ug kadasig sa pagbag-o sa ilang pag-ampo nini? Sa mga liturhiya ug panagtigum, ang pagsusi sa kaugalingon mahimong mahiusa sa luna nga katilingbanon ug masaulugong bahin.

ANG PAKIG-AMBIT

Ang pagpatuhop sa kahidlaw sa Ginoo sa atong kaugalingon dili makapahimulag kanato sa mga panghitabo sa atong palibot. Hinuon kining kahidlawa maoy mag-agni kanato ngadto sa paghimo sa tanan aron ang uban makapahimulos sa gasa sa kamugnaan ug makakaplag ug kalipay sa panimuyo.⁹

Ang paghan-ay sa atong tinguha, ang pagdawat nga dili nato mahuptan ang tanang butang, magdala kanato sa dili paghupot sa mga bahandi alang sa kaugalingon lamang.¹⁰ Kaniadto pang ika-upat nga siglo nagaingon si San Ambrosio, “Ang kabtangang imong gipang-apud-apud ngadto sa mga kabus dili imoha; imo lang gibalik ngadto kanila ang ilaha nang daan.”

Ang pagkat-on sa dili pag-angkon sa tanan makatabang sa pagpalayo kanato sa pag-inusara. Ang kabuhong sa kalibutanong bahandi sagad ubanan kini sa pagtumong sa kaugalingon lamang uban sa pagkawala sa tiunay nga pakiglambigit sa uban. Niini, malisud na ang pagtul-id sa maong kahimtang.¹¹

Daghang kaakuhan sa pagpaambit ang dali rang makabot: pag-umol ug kahugpongan nga magbinuligay, pag-ugmad sa panaghiusang patigayon, pagdawat sa mga langyaw, pagpanaw aron sa pagsinati sa kultura{katikaran} ug kahimtang sa uban diha sa ilang kasinatian, pagpauswag sa panaghugpong tali sa mga balangay, kalungsuran o mga parokya, sa pagtabang sa mga nanginahanglan, paggamit sa minaayo sa

⁹ Ang pagtuo wala lamang galangkob sa natad sa relihiyon.

Walay butang nga kabahin sa atong pagpuyo nga dili apil sa atong pagpakabana. Kabahin sa paagi sa pag-alagad sa Dios ang siyantipikanhong pagtuon, sining, pulitika, patigayon o katilingbanong kaakuhan. Ang pagtuon o pagtudlo, ang makaangayon nga patigayon, ang pag-atiman sa atong banay, ang pagpalapad sa atong panaghigalaay, kining tanan nag-andam sa pag-abot sa Ginharian sa Dios.

¹⁰ Ang kausaban sa kalibutanong ekonomiya ug sistema sa panalapi dili mahitabo kung walay pagbag-o sa tawhanong kasingkasing: unsaon pagpabarog sa haligi sa makaayong sistema kung magpadayon ang pag-angkon sa mga bahandi samtang ang uban naalaot?

¹¹ Sa matag higayon nga kami mangandam sa mga tigum sa mga kabatan-onan sa mga dagkong dakbayan sa kalibutan, isip hutong sa pagpangandam sa “panaw sa pagsalig sa kalibutan,” among gidapit ang liboan ka mga banay sa pagpadayon ug usa o pipila ka mga batan-on sa ilang panimalay, kansang wala nila mailhi ni masabatan ang pinulongan. Ug among nakita nga sa inamay ang kaayo sa tawhanong mithi napadayag.

⁵ Oseas 2:16,21.

⁶ Usa ka higayon, nakig-sulti si Hesus sa usa ka babaye sa may atabay: “Paimna Ako.” (Juan 4:7). Ang kinatibuk-an sa sugilanon, mao nga, Siya giuhaw sa pagpadayag sa gasa sa Dios. Subli niyang gipamulong didto sa Krus, “Giuhaw Ako.” (Juan 19:28). Sa maong pagkutlo, dili ba kaha nga kining maong kauhaw mao ang kinatibuk-ang pagpadayag sa tinguha ni Hesus sa paghatag ug kinabuhi?

⁷ Dili ba mahimong makat-on kita sa pagsagubang sa kakuwang ug di matinong bahin sa kinabuhi? Sagad gitago sa mga adunahang katilingban ang maong kamatuoran. Labing gihatagan ug pagtagad ang pagtabon sa atong kahuyang ug nahikalimtan nga ang kasakit ug kamatayon kabahin usab sa kinabuhi.

⁸ Daygon ko ang Dios nga mitambag kanako, nga bisan sa kagabhion nagatudlo kanako” (Psalm 16:7).

我的心 渴望 上主

mga kabag-ohang kahimanan aron sa pagmugna ug panagtambayayong

Kita angay nga mag-amping nga dili kita mabuntog sa makisdumong panlantaw sa atong ugma nga nag-punting sa mga dili maayong balita. Dili malikayan ang gubat.¹² Ang pagtahud sa isig katawo maoy bililhong gasa aron mag-adam kanato sa kalinaw. Ang mga ali sa mga adunahang nasud gikinahanglan ablihan nga haluag. Hayan makab-ot ang bug-os nga katarungan dinhi sa kalibutan.¹³

Milanog ang pagtukib ug ang awvag sa pagpauswag sa kaangayan ug kalinaw. Ang kulang kanato mao ang kadasig sa pagkamapadayonon labaw pa sa taphawng katuyoan.

Ang ebanghelyo nag-agni kanato sa usa ka yanong pagpuyo. Ang pagpili sa yanong kinabuhi mag-abli sa atong kasing-kasing sa pagpaambit ug sa tim-os nga kalipay gikan sa Dios.

PAGPALALOM SA PAGSALIG SA GINOO

Samtang murag nagkahanaw ang pagtuo sa daghang mga katilingban, nahimugso pag-usab ang kalagnong pagtu-aw. Angay nato nga makaplagan ang tukma nga mga pulong, ang yano lamang, aron dali masabtan sa uban ang pagtuo nga naghatag kanato ug kinabuhi.

Daghan mga tawo ang dili makatuo nga ang Ginoo nahigugma kanila sa tim-os. Alang sa uban, ang daghan nga mga pagsulay nahimong babag sa pagsalig sa Ginoo.¹⁴ Unsaon kaha nato pagpadayag nga hugtanon nga ang Ginoo nagpakabana sa mga duhaduha ug pag-

¹² Luyo sa mga pagduda ug mga kapakyasan, ang unang bahin sa ika 21 nga siglo, napatik ang paglambo sa kinalibutanong panghunana ug ang pag-ugmad sa kahugpong tali sa mga katawhan: ang pagpakatap sa kinatilingbanong panahum, nahimung hinugpong pagtubag sa kasamtangang mga hagit (klima, kalikopan, panglawas, ekonomiya).... Ang hugtanong panaglambigitay sa mga kanasuran mahimong magdala ug kahadlok, motumaw unya ang paghatag ug dakong bili sa nasudnong tinguha batok sa uban. Apan dili ba usab kini mahimo abayan sa panagdait?

¹³ Aduna pa gihapoy siyam ka milyong kabataan ubos sa pangidaron nga lima ang nangamatay matag tuig, ug 29% sa kabataan nga ana sa kabus nga mga nasud ang nahilagom sa malnutrisyon. Kini dili gayud makiangayon. Subay niini, angayang tagaan ug pagtamod nga aduna nay kausaban ang pagtagad sa mga kabataan, salamat ngadto sa Convention on the Rights of the Child {Kasabutan alang sa Katungod sa usa ka Bata}, nga kusganong giuyonan sa Assembly General of the United Nations sa tuig 1989; tungod sa kinalibutanong paningkamot nius-os ug 30%ang pagkamamatay ug malnutrisyon sa mga bata sa niyang 20 ka tuig.

¹⁴ Dili ingon niini ang kahimtang sa tanan nga nakasinati ug mga dagkong pagsulay. Akong nahinumduman ang usa ka batan-ong lalaki didto sa Taizé. Siya adunay nag-umidong sakit nga walay kaayohan. Hilabihan gayud ang iyang pag-antos. Ubay-ubay na nga mga kahigayonan sa maayong pagpuyo ang nahanaw kaniya. Apan luyo niini ang iyang mga mata ug kinatibuk-ang panlantaw nagpabilig andam ug tagana. Usa ka adlaw niana iya akong giingnan, "Karon nahibalo na ako unsa ang kahulogan sa pagsalig. Kaniadto wala ako magkinahanglan ani, apan karon gikinahanglan ko na." Ug nidugang siya sa iyang sulat kanako, "Dili ko angayang tugotan nga ang akong sakit mopasulabi sa akong kaugalingon." Nakaingon ako sa akong kaugalingon: kung nasayod lamang gayud kining bataa unsa kadako ang natabang sa iyang gipamulong aron ako madasig ug ingon man usab ang uban diha sa iyang gipakita nga gawi. Iya gayud nga gipadayag nga mapaubsanon apan tim-os, ang misteryo sa Pagkabanhaw.

ANG AKONG KALAG GIUHAW SA GINOO (SALMO 63)

supak sa mga butang dili masabtan.¹⁵ Si Hesus mismo niambit sa mga kasakit sa mga nag-antos, ug misinggit didto sa krus: "Dios ko, Dios ko, nganong gibiyaaan mo ako?"¹⁶

Daghang mga kabataan nga nagtubo nga walay nag-ingon kanila nga ang Ginoo nahigugma kanila. Unsa kaha ang mag-uban kanila diha sa panaw sa ngadto sa dalan sa pagtuo?

Diha sa ilang pagdako, anaay uban nga nahimulag sa kalambigitan sa Kristohanong katilingban. Sagad dili kini tawo kanila apan ang nagkalain-lain panghitabo maoy nagbutang sa pagtuo sa ubos nga bahin sa hut-ong sa mga kaakuhan. Unsaon kaha sa mga managhigalaay sa pagtabang sa usag-usa sa pagbag-o sa ilang kalambigitan sa katilingban sa mga matuohon sa ilang dapit?

Usahay dako ang gintang sa kaalam sa natad sa pagtuo ug sa kaalam gikan sa ubang tinubdan. Ang pagtuo nga nagpabilin sa ang-ang sa pagkabata maglisod sa pagtubag sa mga hamtong nga pangutana. Atong makaplagan ang kalipay diha sa pagpalawom sa pagtuo sa matag bahin sa atong kinabuhi.¹⁷

PAGBAG-O SA KADASIG

Mitawag kanato ang Ginoo sa pag-usab sa kalibutan uban sa dakong tinguha ug kamapaubsanon.

Ang mga hamtong makapadasig sa mga batan-on . Ang mga kabatan-onan aduna usab katakos nga dili ubos kay sa mga nag-una kanila.

Kining maong kausaban kinahanglan nga magsukad kanato: atong tugotan ang nabanhawng Kristo sa pag-usab sa atong mga kasing-kasing, ug tugotan ta ang Espirito Santo nga motultol kanato sa pagpalawod aron madasigon kitang mopanaw ugma damlag.

Maglipay kita sa kauhaw nga gihatag sa Ginoo diri kanato! Kini nagahatag ug bag-ong kadasig sa atong kinabuhi. "Duol kamo kanako kadtong mga giuhaw; ang si kinsa nga gatinguha sa tubig sa kinabuhi makadawat niini nga walay bugti."¹⁸

fr. Alois

¹⁵ Sa mga basahon nga naglangkob sa Bibliya ug gani bisan sa mga basahon sa ubang mga relihiyon, walay may tawo nga nagpadayag sa pagbatok sa kasakit sa usa ka tawong walay sala diha sa basahon ni Job. Gisalikway ni Job ang ang kawalay kahulogan sa kinabuhing puno sa pag-antos, ug nangindahay siya nga maayo pa kung wala na lang siya nahimugso. Apan bisan pa sa iyang maisugong pagsupak, siya mitamod sa Dios. Wala matubag ang tanan niyang mga pangutana apan nakakaplag siya ug kalinaw sa iyang pakighitagbo sa Ginoo.

¹⁶ Marcos 15:34.

¹⁷ Mga pamaagi: Biblihanhong pundok, hamubong pagbasa sa Bibliya matag adlaw, higayon alang sa hilom nga pamalandong, mga pagbansay diha sa mga parokya, paghimo ug mga pagtuon uban sa mga tulonghaan sa teolohiya o sa ubang pundok sa simbahan, mga kurso sa internet...

¹⁸ Pinadayag 22:17.

UNSA ANG IMONG GIBUHAT SA IMONG KAGAWASAN?

Sa Europa, ug sa lain pang dapit sa kalibutan, usa kini ka hilisgutan nga dako ug luna sa tawhanong galamhan.

Kawhaan na nga mga katuigan ang nilabay, sa wala pa ang mga mahinungdanong kausaban sa Europa, atong naagian ang daghan nga mga babag ug atong napangandaman ang duha ka tigum alang sa mga kabataan-onan sa Tungatungang Europa:

– ang panagtigum sa Sidlakan-ug-Kasadpan sa Pécs, Hungary. Samtang ang mga kabataan-onan nagtigum, naabli ang “Iron Curtain” sa tibuok Europa taliwala sa Hungary ug Austria.

– sa tigum sa Wroclaw, Poland. Samtang nangandam niining maong tigum ang “Berlin Wall” natumba, nagtugot kini sa 50,000 ka mga batan-on sa tibuok Europa nga gawasnong magtigum sa labing unang higayon.

Sa Wroclaw, si Brother Roger namulong sa mga nitambong: “Karong tuiga daghan ang mga tawo nga nakasaksi sa pagkatumpag sa “Iron Curtain,” sa susamang higayon ang ali sa kahadlok ug kaulawan nagun-ob na. Mao nga sa kasamtangang mga adlaw, daghan ang nag-ampo adlaw’g gabii alang sa kagawasan sa tanang katawhan.”

Human sa kawhaan ka tuig, sa 2009, tulo ka panagtigum nagpatapok sa mga batan-on niadtong Mayo: sa Vilnius (Lithuania), niadtong Oktobre sa Pécs (Hungary), ug sa hinapos sa Disyembre sa Poznan (Poland) alang sa tigum sa Europa.

Ning maong kalihokan, buot natong pangutan-on ang atong kaugalingon: karon sa Europa ug sa tibuok kalibutan igo ba ang atong pamalandong mahitungod sa kahulogang sa kagawasan? Ang matag batan-on mahimong mangutana sa ilang kaugalingon: Unsay inyong gihimo sa inyong kagawasan?

PATAGAMTAMA ANG INYONG KAUGALINGON SA PULONG SA DIOS UG SA PAG-AMPO UBAN SA USAG-USA

Sa Tsina nahimamat namo ang mga pundok sa mga Kristiyanos nga dako ang pagtamod sa bililhong bahandi nga mao ang Bibliya.¹ Ang uban buot untang mobasa kanunay, apan malisod kini buhaton . Uban kanila atong hinumduman kining duha ka pamaagi:

– Ang kina-uyokan sa Bibliya mao ang gugma sa Dios. Taliwala sa Dios ug sa tawo, nagsugod ang tanan sa kalolot sa unang gugma; unya niabot ang mga babag ug ang pagluib. Apan ang Ginoo wala mihunong sa paghigugma; Siya kanunayng nangita sa iyang katawhan. Ang Bibliya usa ka sugilanon sa pagkamaunongon sa Dios.

– Gihatag sa Ginoo ang iyang kaugalingon diha ni Kristo: Siya ang Pulong sa Dios. Siya, si Kristo, atong mahimamat sa atong pagbasa sa Bibliya, madungog nato ang iyang tingog; modangat kita sa pakighiusa kaniya.²

Mahimong usa ra ka pulong ang atong mahinumduman sa atong pagbasa . Ang labing mahinungdanon ato kining mapakita sa buhat. Sa nianang paagiha ato kining masabtan.

Didto sa Tsina, kami nag-ampo uban sa mga Kristiyanos ginamit ang mga awit sa Taizé sa ilang pinulongan. Nangutana gani ang uban unsaon pagpahigayon ug pag-ampo kuyog sa uban . Among gipaambit ang pipila ka dali nga paagi ngadto kanila subay sa among dugay na nga kasinatian. Kinahanglan lamang nga mapahaum ang nagkalainlaing hiyas sa matag simbahan.

• Himoa ang lawak alampoonan nga makadapit ngadto sa pag-ampo ginamit ang mga yanong pamaagi, aron kini makapadasig kanato sa pagsimba. {/2}

• Himoa ang pag-ampo nga hapsay: mga awit, salmo, pagbasa, awit, kahilom(8-10 minutos), pangaliya, Amahan Namon, katapusang pag-ampo, awit.

• Pagpili ug mubo nga tudling sa Bibliya sa panahon sa pag-ampo, aron dali masabatan, ug igahin ang pagpasabot sa mga lisud nga tudling human sa pag-ampo .

• Pag-awit ug usa ka tudling nga subli-sublion gikan sa Bibliya o sa tradisyon aron sa ingon niini motuhop kini sa atong galamhan. Ang inawit nga tudling dali masag-ulo ug mahimong madala sa adlaw-adlaw.

• Gamita ang mga yanong timailhan: sa Biernes sa gabii, pagbutang ug krus sa salog. Dapita ang tanan sa pagpatong sa ilang mga agtang ngadto sa krus agi ug timaan sa pagtugyan ngadto kang Kristo sa ilang mga kabudlay ug sa mga kasakit sa kalibutan. Sa Sabado sa gabii mahimong basahon ang Ebanghelyo sa Pagkabanhaw samtang ang mga kabataan modagkot sa mga kandila, timailhan sa pagpakaylap sa kahayag sa Kabanhawan.

¹ Sa tibuok kalibutan, adunay mga panag-ingan kung giunsa pagmahal ang Bibliya, giunsa nini pagtuhop ang kinahiladman sa tawo ug ang kinutuban sa maong gugma. Sa Latvia, niadtong 1940, usa ka pari nga ginganlan ug Victor ang gidakop tungod sa paghupot ug Bibliya. Gilabay sa salog sa mga tinugyanan sa balaod ang Bibliya ug nimando sa pari sa pagyatak niini. Niluhod siya ug nihalok sa Bibliya. Tungod niini siya gisilotan ug napulo ka malisud nga tuig isip ulipon sa Siberia.

² Tali sa Balaang kasulatan, usa ka obispo sa Pilipinas ang niingon: “Ang Dios mamulong, ug ang Dios usab mamati, ilabi na sa mga balo, mga ilo, mga nilutos, ug mga kabus nga hinikawan sa tingog. Ug aron masabtan nato ang Pulong sa Ginoo, ngay natong magkat-onan sa pagpamati sama nga Dios namati.”

Mga pipila ka lakang sa 2010 sa panaw sa pagsalig diha sa kalibutan

Si Brother Alois uban sa pipila ka brothers moadto sa...

... sa Portugal: tigum sa Porto, Febrero 13-16

...sa Bosnia-Herzegovina: Sarajevo, Septembre 3-5

... sa Norway:

Oslo ug Trondheim, Septembre 17-19

Kalibutanong tigum sa mga kabatanonan

Ang ika-limang Asyanong tigum ipahigayon sa Pilipinas, sa Manila, Febrero 3-7, 2010
Sa tigum sa Poznan ipahibalo ang dapit sa...
...ikaduhang kalibutanong tigum sa Latin America, Disyembre 8-12, 2010
...ang ika 33 Europyohanong Tigum, December 28, 2010 – unang adlaw sa Enero 2011

Mga mensahe nga nadawat alang sa tigum sa Poznan: tan-awa sa <http://www.taize.fr>